



Glygge-Zyttig vo de  
JOKER WAGGIS

Usgoob 4 - im Juni 2013

## Events

Usbligg uff s'Joor

SYTTE 3

# 2013



## Aadie Patrick

E Ära goot z'Änd

SYTTE 2



## Unter der Lupe

Der Stephan

SYTTE 3



# Fasnachts-Ruggblig: Noch drey Dääg ... ... scho wiider verby!



D'JOKER WAGGIS an der Basler Fasnacht - e Mutlikulti-Huffe uff der Suechi nach Asyl ...  
Bild voorne: Mathias, Busi, Patrick, Galli, Michi, Fäb und Beni (v.l.n.r.). Bild hinte: Stephan.

Mit der erschte offizielle Waage-Yyweiheg am Samschtig vor em Moorgestraich, hän d'JOKER WAGGIS zämme mit de Passiv-Mitglieder und de Uelischränzer uff d'Fasnacht 2013 aagstosse. Bi traumhaftem Wätter und aagnäame Temperature, het me sich gmainsam uff die drey scheenschte Dääg yygstumme.

Anders als vor eme Joor – deert isch jo kurz vor der Fasnacht fascht der Draggdoor abgläage – isch der Draggdoor-Samschtig 2013 rrybiglos iiber d'Biihni gange. Vorsichtshalber het me sich bereits um 10:00 Uhr besammelt, um der Draggdoor z'hoole und der Waage ändgiltig fasnachtsfertig z'mache. Dernooh hän no s'Binggis- und s'Bar-Wäägeli miesse in d'Stadt verschoobe wärde, eh denn d'Waage-Yyweiheg in Birsfælde het kenne starte.

Alli Aawääsende sin derby in Gnuss vo Grillwirscht, Bier oder au eme Glas Wysse ko. Und derzue het

me erscht no kenne e Oor voll Fasnacht nää – denn näächscht de yyglaadene Uelischränzer, isch au der Blätzbumser Fasnachts-Umzug e Querstrooss wyter no immer in vollem Gang gsi.

Als Geegelaischtig hän sich die Aawääsende miesse bzw. deerfe als Sprayer an unserem neu baute Waage vereewige. Am Schluss het sich em Bedrachter e verwirrend aber herrligs Bild botte. Und doo dernooh het d'Fasnacht 2013 also ändlig kenne koo ...

Am Fasnachts-Mäntig – nach ere allewyyl kurze Nacht mit wenig Schloof – het me sich bereits um 10:00 Uhr wiider zem Waagelaade troffe. Doch wär het bi däm Traumwätter welle an s'Schloofe dängge!

So hän sich d'JOKER WAGGIS kurz nach Mittag mit em voll gladene Waage uff e Wäg zem Wettstaiplatz gmacht. Deert hän die erschte Passiv-Mitglieder, Frinde und Bekannte scho ungeduldig

WYTER SYTTE 2

## FORTSETZIG

gwarte. Denn es het am Fasnachts-Apero bereits wiider ebbis zem Aastosse gää. "Savoir-vivre" à la JOKER WAGGIS ...

Um 13:30 Uhr isch es denn uff d'Route gange. S'usgspilte Sujet "Noch drey Dääg zrug" isch bi de maischte Schauluschtige mergglic guet aakoo. Das isch sicher au doo dra glääge, dass doch e gwissi Äänligkait zur erscht kurz vorhär abgrissene Villa Rosenau vorhande gsi isch. Obwool der Waage doch aigentlig e mobils Asylhaim hätt sotte daargstelle ...



"Asylbewäärber" uff Tour: Galli und Busi

Der Noomidaag vom Fasnachts-Zyschtig het wie allewyl de Binggis gheert. Ab 14:30 Uhr hän sich gwissi JOKER WAGGIS bim Banggverain yygfunde zem de Glainschte d'Meegligkait z'biete, uff em Binggis-Wäägeli Fasnachts-Luft z'schnuppere.

Nach em Ydunggle het me sich bald verabschiidet und s'Binggis-Wäägeli duur s'Bar-Wäägeli usduscht. Nach eme grandioose Nachtässe am Rümelinsplatz – der Michi het Chilli con Carne aane zauberet – isch s'Bar-Wäägeli scho tradizioonell an der Birsig-Sinfonie zem Ysatz ko. Und bis wyt nach Mitternacht sin d'JOKER WAGGIS dernooh no uff der Gass gsi ...

Uff allgemaine Wunsch het me sich denn am Fasnachts-Mittwuch rund e Stund speeter besammet. Die vergangene Dääg sin hald nit spurlos an de JOKER WAGGIS verby gange, und us Erfaarig isch am Mittwuchmoorge allgemain bitz d'Luft duss. Me het sich aber nomol uffgrafft und uff e Wäg an Wettstaiplatz gmacht. Doch kuum aakoo, het zu allem liberfluss au no s'Wätter umschlaage – was d'Motivazioon grad wiider e weeneli

het loo singge. Kuum uff der Route, isch doo dervo aber nit mee z'spiire gsi. D'JOKER WAGGIS hän nomol alles gää und der Petrus het sich bis zem Schluss au so guet wie meeglig zrug ghalte.



Der Patrick am Intrigiere uff der Gass ...

Und denn hän d'JOKER WAGGIS an däm Noomidaag au no iire grosse Ufftritt im TeleBasel gha. Bim Duurefaare am Märtplatz hän d'Moderatoore daatsächlich s'Gfyyll gha, es handelt sich um d'Villa Rosenau. "Kuum z'glaube, dass die das Sujet innert so kurzer Zyt hän kenne umzsetze" het's ghaisse. Doch denn sin sie sich unsicher worde. "Jää, isch es am Änd ebbe e Asylhaim? Fir uns gseet's eenter us wie e mobils Puff." E Gnuss fir d'JOKER WAGGIS ...

## Aadie Patrick - e Ära goot z'Änd!

**An der Lämpesitzig, vier Wuche noch der Fasnacht 2013, het der**

Am Uffaarts-Donnschtig um 11:30 Uhr hän sich die erschte aggtive JOKER WAGGIS bi der Dorfkirche z'Muttentz troffe, zem gmainsam uff e Sulzkopf z'lauffe, wo alljeerlig der Muttentzer Banndaag statt findet. Mit em Patrick und em Stephan het me isch erscht speeter diräggt uff em Sulzkopf troffe. Nur der Mathias isch laider nit aawäasend gsi.

Wie allewyl isch der Uffstiig aasträngend gsi, und drum hän doo scho miesse die erschte Bierli dra glaube. Doch oobe aakoo, isch me nadyrlig mächtig stolz und het sich syy Wurscht vom Grill verdient.

Der Muttentzer Banndaag gilt fir d'JOKER WAGGIS syt ainiger Zyt als Start ins neue Fasnachts-Joor. Me trifft sich s'erscht Mol wiider alli nach der Lämpesitzig, zem der

**Patrick e weeneli iiberraschend syy Usdritt bekannt gää. Und am**



Kurze Zwischestopp nach halbem Uffstiig zem Sulzkopf: Michi, Galli, Busi, Fäb und Beni

Zämmehalt z'pflääge und evtl. bereits die aint oder ander Ydee uszusche. In vergangene Joor isch soo daatsächlich scho meermols e

**Muttentzer Banndaag isch er offiziell verabschiidet worde.**

fascht fertigs Sujet entstande. Doch in däm Joor het dää Termin fir d'JOKER WAGGIS vorwiegend



## FORTSETZIG

e anderi Bedyytig gha. Het sich doch der Patrick nach 17 Joor in dääre Glygge entscheide, uff die näggscht Fasnacht hii, anderi Wääg yyzschloo. Drum het er an der Lämpesitzig 2013 syy Usdritt bi de JOKER WAGGIS bekannt gää.

"Das Kind isch erwaggse worde, drum ka ich's mit guetem Gwisse lo go". Das sin in ebbe syyni Woort gsi, mit dääne er d'Glygge am bsaitte Daag iiberrascht het. Und nadyrlig het er sich nit lo lumpe und het zu sym Usdritt no e paar Zyyle vordrait.

E beweegende Momänt isch es fir alli gsi. Gseet me doch d'JOKER WAGGIS kuum Mol e Minute ruhig.

Bis zem Banndaag isch denn aber au dää Schogg iiberwunde gsi und langsam isch der Alldaag zrugg koo. Und schliesslig isch es fir d'JOKER WAGGIS an der Zyt gsi, sich bim Patrick fir die vergangene Joor z'bedange.

Der Beni het doo derzue ebefalls e paar Väärsli dichtet und gmainsam isch e glains Abschiidsgschängg iibergää worde.



Bild oobe: Der Patrick isch sichtbar grient

Bild linggs: Der Beni het alles gää!  
"Ob-Maa, Frau, Deifel oder Ängel,  
der Paddy bliibt e glaine Bängel"

## Unter der Lupe: Der Stephan

In dääre Rubrigg wird allewyl ai JOKER genauer voorgstellt. Diesmol näme miir der Stephan unter d'Lupe.

**72stunde: Wie alt bisch Du?**

Stephan: 33 wird gmungglet.

**72stunde: Wo bisch Du diheim?**

Stephan: In der scheenschte Stadt, nadyrlig z'Basel ...

**72stunde: Was machsch brueflig?**

Stephan: Das frooge die maischte (lacht). Nai, Spass bi Sytte - ich bi Gschäftsfierer und Barkeeper vom Nelson Pub in Basel.

**72stunde: Was machsch Du in Diiner Freizyt?**

Stephan: Ich spiil Dart, faar Velo, oder versuech mis soziaale Umfäld z'pflääge ... am liebschte gang ich mit Frinde in Usgang oder e gmietlige Spiilooobe go verbringe. Und nadyrlig der FCB nit vergässe!

**72stunde: Syt wenn bisch Du bi de JOKER WAGGIS?**

Stephan: Syt miir unseri aigene Goschdyym hän - also syt der Fasnacht 2000.

**72stunde: Wie bisch Du zue de JOKER WAGGIS gstoosse?**

Stephan: Bi deertmols e glaini Abmachig yygange - ich kumm zue de JOKER WAGGIS, im Geegezug kunnt der Patrick zue unserem FCB-Fanclub. Und nadyrlig us Freud an der Fasnacht, wo mi scho als Binggis paggt het. An dääre Stell au e Dangg an mii Mamme ...

**72stunde: Was isch Dii spezielli Funggzioon bi de JOKER WAGGIS?**

Stephan: Doo git's verschiiideni. Ich bi jo z.B. fir unseri Homepage zueständig und fir d'Häärstellig vo Artiggel wie T-Shirts, Kappe, etc. Aber au bi allgemaine Sache wie Waagebau, Events, usw. ha ich iiberall bitz d'Finger dinne ...



**72stunde: Weeles isch Dii scheenschti Fasnacht gsi?**

Stephan: Waart kurz ... wiewyl Zyt häämer?! ... Nai, ich dängg aifach, dass jeedi Fasnacht uff iiri Art speziell isch. Wobyy me glaub scho sage ka, dass je älter miir wärde, desto usprägter gniesse mir die ganzi Fasnachts-Zyt. Das macht's uff e Art doch scheener.

**72stunde: Und weeles isch Dii scheenschts Erlääbnis mit de JOKER WAGGIS gsi?**

Stephan: Grad nomol so e gladdi Froog ... Ich wurd sage, das ka me nit uff ai Erlääbnis oder ai glaine Momänt beschrängge. Vvyl mee isch es d'Veränderig, wo unseri

Glygge in de letschte paar Joor duurlääbt het. Me merggt, dass d'JOKER WAGGIS ryfer worde sin. Und es isch e gewisse Zämmehalt entstande, wo soo bishäär nit vorhande gsi isch.

**72stunde: Was sin Diini Wunsch fir d'Zuekunft bi de JOKER WAGGIS?**

Stephan: Ganz aifach. Dass miir bliibe, was miir sin: E gladde Huffe! Ah jää ... und e neue Waage wär nit schlächt ...

## Usbligg uff s'Joor 2013

**Bis es am Mäntig, 10. Meerz 2014 vieri schloot, hän d'JOKER WAGGIS no ainiges vor.**

Langwylig wird's uff kai Fall. Sin miir doch no immer uff der Suechi nach eme neue Waggiswaage. Zuedäm warte diversi Events, wo au fir unseri Frinde und Passiv-Mitglieder interessant syy kennte:

**19. - 27. Juli 2013**  
JOKER WAGGIS am BaselTattoo

**24. Auguscht 2013**  
JOKER WAGGIS-Grillplausch

**Auguscht / Septämber 2013**  
Garage-Sanierig

**im Novämber 2013**  
JOKER WAGGIS-Mässbummel